



Aningaasaqarnermut Nunanullu Allanut Naalakkersuisoq

Aningaasaqarnermut Ataatsimiititaliap suliaq nr. 01.31.06/06-00192 pillugu pingasunngornermi ulloq 20. september 2006-imi aalajangiinera pillugu Naalakkersuisunut ilisimatitsineq.

(Naalakkersuisut ulloq 8. september 2006-imi aalajangiineranni imm. 2f.)

Innarluutilinnut suliassaqarfimmi 30.13.03-mi nuussinissamik qinnuteqaat

Naalakkersuisut inassutigaat:

- kontomi pingaarnermi 30.13.03-mi, Kalaallit Nunaanni Danmarkimilu innarluutilinnik isumaginninnermut kiisalu kommuninut misiligummik nuussinermut tunngasumi, aningaasaliissutit 2006-imi 5,8 mio. kr.-inik amerlineqassasut
- kontomi pingaarnermi 30.13.41-mi, Innarluutilinnut angerlarsimaffinnut tunngasuni, aningaasaliissutit 2006-imi 3,2 mio. kr.-inik ikilineqassasut
- kontomi pingaarnermi 30.01.03-mi, Isumaginninneq pillugu pikkorissartitsinernut ilinniartitseqqinnernullu tunngasumi, aningaasaliissutit 2006-imi 1,8 mio.kr.-inik ikilineqassasut
- kontomi pingaarnermi 30.14.29-mi, Pinaveersaartitsinermut tunngasumi, aningaasaliissutit 2006-imi 0,8 mio. kr.-inik ikilineqassasut.

Aningaasaqarnermut Ataatsimiititaliap oqaaseqaatai

Isumaginninnermi Naammagittaalliuuteqartarfimmit aalajangiinerit pereersut aalajangiussassatullu naatsorsuutigineqartut tunngavigalugit innarluutilinnut tunngasuni aningaasartuutaanerussutissanut matussutissatut katillugit 5,8 mio. kr.-it suliama matumani qinnutigineqarput.

2006-imi aningaasanut inatsisissatut siunnersuummut II-mut atatillugu Naalakkersuisut ilaatigut ima paasissutissiipput:

„2006-imi kommunit aningaasaqarnermik aqutsinerat pisortaqaarfimmit immikkut sammineqarpoq, aammalu uppernarsaatinik nassitsisarnermut aningaasaqarnerlu pillugu ingerlaavartumik nalunaaruteqartarnissamut allanik piumasaaqateqartoqassaaq. Tamatuma saniatigut 2006-imut aningaasaqarnikkut killissarititaasut eqqarsaatigalugit kommunit innarluutilit pillugit inatsimmik aningaasaliissutinillu oqartussaaffimmik aqutsinerat ingerlaavartumik malinnaaffigineqassaaq.

Kommunini misilittaaffiusuni tamani nakkutilliartortoqareerpat 2005-imi misiligutitut aaqqissuussineq naliliffigineqassaaq, taamaalilluni misilittakkat pitsaasut pitsaanginnerusullu innarluutilinnik isumaginninnerup kommuninut ataavartumik tunniunneqarnissaanut sulissutiginneqqinnermi ilanngunneqarnissaat pillugu.

2005-imut naatsorsuutit kisitsisitaat suli pigineqanngillat, ilaatigullu aningaasanik uninngasuutinik utertitsisoqannginnera pissutigalugu kontomi ataatsimut isigalugu atuinikinnerusoqarnissaa naatsorsuutigineqarpoq.

2003-mi 2004-milu innarluutilinnut tunngasuni sukatiterineq pissutigalugu naalackersuisoqarfiup misigaa aalajangikkat amerlanerujartuinnartut Isumaginninnermi Naammagittaalliuuteqartarfimmut naammagittaalliuutigineqartut, maluginiarneqarporlu annertuumik innarluutilinnut ikorfartuutinut itigartitsissutit tamarmik kommuninit naammagittaalliuutigineqartartut.

Naalackersuisoqarfiup 2005-ip ingerlanerani Isumaginninnermi Naammagittaalliuuteqartarfimmit tiguai naammagittaalliuutit pillugit aalajangikkat 2002-meersut 2003-meersullu aammalu aalajangikkat ataasiakkaat 2004-meersut 2005-imeersullu.

2005-ip ingerlanerani naammagittaalliuutinit Isumaginninnermi Naammagittaalliuuteqartarfimmit tiguneqartunit Ilaqutariinnermut Pisortaqarfik suliata affaasa missaannut atatillugu isumaqatigineqarpoq, suliata pingajorarterutaat kommuninut iluaqutaasussamik aalajangiqaallutik, taakkunanillu ikitsuinnaat tunngaviatigut aalajangiqaapput suliallu sinneri nutaamik suliarisassanngorlugit Ilaqutariinnermut Pisortaqarfimmut utertinneqartuullutik.

Suliani tamangajanni Ilaqutariinnermut Pisortaqarfiup aalajangiqaana Isumaginninnermi Naammagittaalliuuteqartarfimmit allanngortinneqarsimatillugu tunngavigilersuutigineqartoq tassaavoq Ilaqutariinnermut Pisortaqarfiup itigartitsinermini tunngavigilersuutigisaata naammaginartumik inernilerneqarsimannginnera imaluunniit suliamik ingerlatsinermi kukkuluttortoqarsimanera, taamaalillunilu suliata kommunimut iluaqutissanngorluni. Manna tikillugu tunngaviusumik suliata pingaarutilit aningaasaqarnikkut annertuumik malitseqanngitsut ikitsuunnguupput, taamaattumillu nalileruminaappoq Isumaginninnermi Naammagittaalliuuteqartarfik suliassaqarfimmi aningaasartuuteqarnermut annertuumik sunniuteqartunik qanoq annertutigisumik tunngaviusumik aalajangiissanersoq.

Naalackersuisoqarfiup ilisimaaraa ukiunut 2004, 2005 aamma 2006-imut naammagittaalliuutit naammagittaalliuuteqartarfimmi aalajangiifigineqartussat arlallit suli uninngasuutigineqartut.

Taamaattumik Isumaginninnermi Naammagittaalliuuteqartarfimmi aalajangikkat aningaasaqarnikkut kinguneqangaatsiarsinnaanerat Naalackersuisut annilaanngatigisinnaavaat.

Suliassaqarfimmi suliarnik ingerlatsinerup pitsaassusaa qulakkeerniarlugu Naalackersuisoqarfik 2005-imi aasaanerani pisortaqarfimmi aaqqissuussaaneermik allanngortiterivoq, tamatumani ilaatigut nunap immikkoortuini allaffiit atorunnaarsinneqarlutik siunnersortinillu sullinneqarneq Nuummi Ilaqutariinnermut Pisortaqarfimmi ataatsimoortinneqalerluni. Tamanna kommunit eqqarsaatigalugit suliarnik ingerlatsinerup assigiiaarnerunissaanut aammalu sulianik ingerlatsinerup, inatsisip aningaasaqarnikkullu tunngavissap akornanni naapertuunnerusoqalernissaanut qulakkeereqataassaaq.

Naalakkersuisoqarfik isumaqarpoq suliassaqarfimmi ukioq manna aningaasaliissutissatut siunnersuutip qaffasissusia piviusorsiortuusoq.“

Taamaalilluni aningaasaliissuteqarnissamik qinnuteqaat matumani pineqartoq Naalakkersuisunit siusinnerusukkut paasissutissiissutigineqartunut naapertuuttoq Aningaasaqarnermut Ataatsimiititaliamit oqaatigineqassaaq. Ataatsimiititaliamilli oqaatiginngitsoorneqassanngilaq taama annertutigisunik aningaasaliissuteqaqqinnissamik pisariaqartitsilerneramik kinguneqartumik Ilaqutariinnermut Pisortaqaqarfimmi suliamik suliarinninnermi kukkusoqarsimanera assorsuaq ajuusaarnarmat.

Naammagittaalliuuteqartarfimmi aalajangiinerit 2007-imi aningaasatigut kinguneqaatigisinnaasaattut naatsorsuutigineqartut 2007-imi aningaasanut inatsisissatut siunnersuummut ilanngunneqarnissaat Naalakkersuisut qulakkiissagaat Aningaasaqarnermut Ataatsimiititaliamit naatsorsuutigineqarpoq. Tamanna aamma atuuppoq aalajangiinerit, 2006-imi ukiup naalernerani ima kingusitsigisukkut pisut, taamaattumillu aningaanut inatsisip ukioq manna atuuffiani iliuseqarfigissallugit ajornakusoortut aningaasatigut kinguneqaatissaattut naatsorsuutigisanut, tak. tamanna pillugu atortussani Aningaasaqarnermut Ataatsimiititaliamut nassiunneqartuni allassimasut.

Nuussinissamik qinnuteqaammi aningaasalersuiffissatut Naalakkersuisunit siunnersuutigineqartut maannangaaq isumakulunnartinneqartut Aningaasaqarnermut Ataatsimiititaliamit oqaatigineqassaaq. Kontomit pingaarnemit 30.14.29-imit, Pinaveersaartitsinnermut tunngasumit, aningaasanik atuinissap pisarialersinnaanera suli aarleqqutigineqarsinnaasoq ataatsimiititaliaq isumaqarpoq. Tamatuma saniatigut isumaginninnermut tunngasuni ingerlaavartumik pikkorissartitsinissaq ilinniartitseqqittarnissarlu pingaaruteqartutut ataatsimiititaliamit pingaartinneqarpoq, taamaattumillu siunertamut tassunga kontomi pingaarnemi 30.01.03-mi aningaasanik atuisinnaasimannginneq ataatsimiititaliamit ajuusaarnartinneqarpoq. Naalakkersuisulli qinnuteqaataat ataatsimiititaliamit ima paasineqartariaqarpoq; sukumiisumik isumaliutersuuteqareernertik naatsorsuinertillu kiisalu aningaasaliissutinik ikililerinermik eqqorneqartussanik oqaloqatiginnereernertik tunngavigalugu kontoni pineqartuni aningaasat immikkoortinneqaaqaartut tamakkerlutik 2006-imi atorneqarnissaat qanorluunniit pisariaqartinneqalernavianngitsoq Naalakkersuisut naliliisimasut. Tamanna iluarisimaarlugu ataatsimiititaliamit tusaatissatut tiguneqarpoq, tassa kontot pingaarnemit pineqartut 2006-ip ingerlanerani kingusinnerusukkut aningaasaliiffigineqaqqinnissaasa qinnuteqaatiginissaa Naalakkersuisunit pisariaqartinneqalissanngitsoq naatsorsuutigineqarmat.

Innarluutilinnut tunngasuni aningaasartuutininik utertitsiffigineqarnissamik qinnuteqaatinik kommunit arlallit Namminersornerullutik Oqartussanut saqqummiussimannginnerat Naalakkersuisut isummernissaannut tunngavissiami allassimavoq. Paasissutissat taakku itisiliiffigineqarnissaat Aningaasaqarnermut Ataatsimiititaliamit qinnutigineqassaaq. Ataatsimiititaliamummi paasissutissiissutigineqarpoq ilaatigut Nuup kommunea immikkoortumi aningaasartuutaasimasunik utertitsiffigineqarnissamik arlaleriarluni qinnuteqarsimasoq, Ilaqutariinnermulli Pisortaqaqarfimmit akissummik tigusaqarsimanani.

Missingersuutinut ilanngussani ilusiliinnermut tunngasunik arlalinnik kukkuneqartoq naggasiullugu oqaatigineqassaaq. Taamaalillunilu + aamma – paarlaanneqarsimapput, taamaalillunilu oqaasertat aningaasartallu imminnut ataqatigiikkunnaarlutik. Inatsisitigut tunngaviit missingersuutinut ilanngussat naggataata tungaanni allassimasut kukkusuunnigikkunik amigaateqartiterput kontomullu pingaarnemit 30.13.03-imut missingersuutinut ilanngussami titarnerit aappaat oqaatsitigut annikitsumik amigaateqarpoq. Missingersuutinut ilanngussaq 2006-imi ilassutitut aningaasaliissutinut inatsimmi

ilanngunneqartinnagu kukkunerit taakku aaqqinneqarnissaat Aningaasaqarnermut Ataatsmiititaliamit naatsorsuutigineqarpoq.

Aningaasaqarnermut Ataatsmiititaliap aalajangiinera

Siuliani oqaaseqaatigineqartut innersuussutigalugit Naalackersuisut inassuteqaataat Aningaasaqarnermut Ataatsmiititaliamit **akuersissutigineqarput**. Tamatuma peqatigisaanik apeqqutit oqaaseqaatitallit siuliani allassimasut ullumimiit ullut 14-it qaangiutsinnagit Naalackersuisunit akineqarnissaat ataatsmiititaliamit qinnutigineqassaaq. Naalackersuisut akissuteqaataat kalaallisut danskisullu kiisalu qarasaasiakkut unnga nassiuteqquneqarpoq: nch@gh.gl.

Inussiarnersumik inuulluaqqusilluta

Ellen Christoffersen
Aningaasaqarnermut Ataatsmiititaliap siulittaasua